




Broj predmeta: Ž-BR-01-94/25, Ž-BR-01-95/25, Ž-BR-01-96/25, Ž-BL-01-172/25 i Ž-BL-01-187/25

Broj Preporuke: P-83/25

Dana: 26. 3. 2025. godine



Vijeće ministara Bosne i Hercegovine

-Ministarstvo za ljudska prava i izbjeglice Bosne i Hercegovine

-Ministarstvo civilnih poslova Bosne i Hercegovine

Vlada Brčko distrikta Bosne i Hercegovine

n/r Gradonačelnika

Odjel za zdravstvo i ostale usluge

n/r Šefa Odjela na znanje

Policija Brčko distrikta Bosne i Hercegovine

n/r Šefa policije

Tužiteljstvo Brčko distrikta Bosne i Hercegovine

n/r v.d. Glavnog tužitelja

Preporuka Ombudsmana Bosne i Hercegovine

Ombudsmeni za ljudska prava Bosne i Hercegovine sukladno članku 14. Pravila postupka Institucije Ombudsmana za ljudska prava Bosne i Hercegovine otvorili su po službenoj dužnosti predmete u vezi događaja koji se odnose na pronalazak 31-og djeteta bez roditeljske pratnje na području Brčko distrikta Bosne i Hercegovine. Medijski naslovi implicirali su teška kršenja prava djece kao mogućih žrtava trgovine ljudima. Predmeti su registrirani pod brojevima Ž-BR-01-94/25, Ž-BR-01-95/25 i Ž-BR-01-96/25.

Ombudsmeni Bosne i Hercegovine od Tužiteljstva Brčko distrikta Bosne i Hercegovine, Policije Brčko distrikta Bosne i Hercegovine i Vlade Brčko distrikta Bosne, Hercegovine, Pododjela za socijalnu zaštitu zahtijevali su informacije o poduzetim zakonskim radnjama iz okvira njihove nadležnosti.

Imajući u vidu da su pokrenute žurne istražne radnje zaprimljeni su odgovori koji ne narušavaju sam tijek istrage.

Policija Brčko distrikta Bosne i Hercegovine u svome odgovoru broj 14.02-04.2-16081/25 od 04.03.2025. godine navodi: "Policijski službenici Policije Brčko distrikta BiH su dana 25.02.2025. godine, preduzimajući mjere i radnje iz svoje nadležnosti, pod nadzorom Tužilaštva Brčko distrikta BiH u jednoj kući na području Brčkog pronašli 31 djetete i u saradnji sa Pododjelom za socijalnu zaštitu Brčko distrikta BiH, te Crvenim krstom/križom Brčko distrikta BiH obezbijedili im adekvatan smještaj do utvrđivanja svih činjenica i okolnosti.

Od navedene djece, najmlađe djetete je starosti šest mjeseci a najstarije starosti 12 godina. desetoro djece je uzrasta do dvije godine, a troje djece nije još prohodalo. Veći broj djece prilikom pronalaska kod sebe nije imao identifikaciona dokumenta. Imajući u vidu najbolji interes djece i osjetljivost istrage čije provođenje zahtijeva određeni vremenski period, a u cilju pružanja što adekvatnije medicinske, psihološke i svake druge potrebne stručne pomoći, definisane su aktivnosti Pododjela za socijalnu zaštitu, Crvenog krsta/križa, kao i psihologa Policije Brčko distrikta BiH.

U okviru dosadašnjih aktivnosti, slobode je lišeno ukupno osam lica, od kojih je protiv tri lica podnesen Izvještaj Tužilaštvu Brčko distrikta BiH zbog postojanja osnova sumnje da su počinili krivična djela „Trgovina ljudima“ iz člana 207a i „Zapuštanje ili zlostavljanje djeteta“ iz člana 216. stav (2) Krivičnog zakona Brčko distrikta BiH, dok će protiv preostalih pet lica u narednom periodu biti podnesen Izvještaj Tužilaštvu Brčko distrikta BiH. Od strane Osnovnog suda Brčko distrikta BiH protiv dva lica određena je mjera pritvora. Dalje istražne radnje se nastavljaju nesmanjenim intenzitetom, u skladu sa naredbom Tužilaštva Brčko distrikta BiH.

Tužiteljstvo Brčko distrikta BiH dostavilo je akt broj: A-133/2025 od 06.03.2025. godine u kojem se navodi: "da je odmah po prvim zaprimljenim saznanjima, dana 25.02.2025.godine, postupajući tužilac Tužilaštvo Brčko distrikta BiH pristupio je lokaciji pronalaska 31 djeteta bez roditeljske pratnje u stambenom objektu na adresi u ul. Bakije-Selimovića broj 35 u naselju Ivici u Brčko distriktu BiH. Preduzimajući aktivnosti iz svoje nadležnosti Tužilaštvo je izdalo tužilačke naredbe za provođenje radnje uviđaja i saslušanja zatečenih punoljetnih lica, te od nadležnog Osnovnog suda Brčko distrikta BiH zatraženo je odobrenje za provođenje pretresa stambenih objekta na lokaciji na kojim su pronađena djeca. Izvršene su radnje uviđaja i pretresa prostorija, privođenja i ispitivanja fizičkih lica.

Tužilaštvo poduzima sve raspoložive istražne radnje, mjere i aktivnosti koje su po svojoj prirodi vrlo složene i obimne u odnosu na predmetna krivična djelo, pa tako je u cilju pouzdanog utvrđenja identiteta pronađene djece, od nadležnog Osnovnog suda Brčko distrikta BiH zatražena dozvola za provođenje Naredbe za tjelesni pregled - uzimanje bukalnog brisa za 31 pronađeno djetete, kao i za 17 u ovom trenutku poznatih roditelja, u svrhu provođenja DNK analize.

Ističu da je počevši od dana 28.02.2025.godine održan veći broj koordinacionih sastanaka između Gradonačelnika Brčko distrikta BiH, Šefa Policije Brčko distrikta BiH, VD Glavnog tužioca Tužilaštva Brčko distrikta BiH, predstavnika Centra za socijalni rad i Crvenog križa/krsta Brčko distrikta BiH u cilju uređenja pravnog osnova po kojem su djeca u konkretnom slučaju izuzeta od roditelja, te planiranju daljih mjera, sredstava i radnji na osiguranju adekvatne njege, brige i smještaja pronađene djece bez roditeljske pratnje."

Vlada Brčko distrikta Bosne, Hercegovine, Odjel za zdravstvo i ostale usluge u svome izjašnjenju akt broj 34-000151/25 od 06.03.2025.godine obavještava da: "... organ starateljstva — Pododjeljenja za socijalnu zaštitu, Odjeljenje za zdravstvo i ostale usluge Vlade Brčko distrikta BiH, postupajući u skladu sa nadležnostima, počevši od dana 25.02.2025. godine i nadalje,

preduzima sve mjere i radnje u cilju zaštite i prava interesa tridesetjednog djeteta zatečenog bez prisustva roditelja, staraoca ili usvojica u kući na adresi Bahije Selimovića 35 gore navedenog datuma. Naime, prilikom zaticanja pomenute djece, uzrasta od nepunih godinu dana starosti do dvanaest godina, bez utvrđenog identiteta, primjenjeni su referalni mehanizmi, obavješteni su Policija Distrikta i Crveni krst Brčko distrikta BiH, koji su dalje zatim obavijestili Tužilaštva Brčko distrikta BiH, Javnu zdravstvenu ustanovu Brčko distrikta BiH te Inspektorat Brčko distrikta BiH. Slijedom radnji, djeca su prvo prevežena vozilima Crvenog krsta u pratnji službenih lica organa starateljstva te u pratnji policijskog vozila, u Dom zdravlja na pregled pedijatra, nakon čega su privremeno zbrinuti u smještaj u skladu s Programom zaštite djece žrtava roditeljske zloupotrebe. Djeca su pod nadzorom, brigom i njegom 24/7 od strane zaposlenika svih gore navedenih ustanova uz napomenu da je svako dijete stavljeno pod starateljstvo, koje poslove staraoca će se vršiti neposredno preko stručnih lica Organa starateljstva-Pododjeljenja sa socijalnu zaštitu, Odjeljenje za zdravstvo i ostale usluge Vlade Brčko distrikta BiH.”

Tijekom postupka pred Institucijom Ombudsmana za ljudska prava Bosne i Hercegovine zaprimljena je i žalba kojom se ukazuje na povredu poštivanja načela zaštite djece i prava potencijalnih žrtava trgovine ljudima, što je registrirano pod brojem Ž-BL-01-172/25.

Između ostalog navedeno je da je “ zamjenica ministra za ljudska prava Bosne i Hercegovine prilikom posjete Brčkom distriktu, pored razgovora s nadležnim institucijama, posjetila i krizni smještaj u kojem se djeca privremeno nalaze. Prema raspoloživim informacijama, razgovor s djecom u kriznom smještaju obavljen je bez prethodne konsultacije i prisustva privremenih staratelja djece (socijalnih radnika) ili ovlaštenog stručnog radnika (psihologa), što predstavlja ozbiljno kršenje s međunarodnih i domaćih standarda zaštite djece. Faza refleksije, u kojoj se djeca potencijalne žrtve trgovine ljudima trenutno nalaze, zahtijeva minimalnu interakciju s vanjskim svijetom kako bi se osigurala njihova psihofizička stabilizacija. Dodatni razgovori s djecom u ovakvoj fazi, posebno od predstavnika institucija koje nisu dio referalnog mehanizma borbe protiv trgovine ljudima, ne samo da mogu dodatno traumatizirati djecu, već narušavaju i proces njihovog oporavka.

Ono što nas posebno treba zabrinuti jeste činjenica da je zamjenica ministra za ljudska prava, gospođa Jurišić, na svojoj Facebook stranici objavila fotografiju sa razgovora s jednom od djevojčica, u okruženju u kojem trenutno boravi, te je javnosti podijelila detalje razgovora. Iako je djevojčica snimljena s leđa, ovakav postupak ne samo da krši načela privatnosti i povjerljivosti, već je i u suprotnosti s periodom refleksije i akutnom fazom oporavka potencijalnih žrtava.”

Vlada Brčko distrikta Bosne i Hercegovine, Odjel za zdravstvo i ostale usluge, Pododjel za socijalnu zaštitu obratila se podneskom broj predmeta: 34-000161/25, broj akta: 05-1246ZB-0004/25 od 6. 3. 2025. godine s naznakom Molbom za suradnju u kojem se navodi: “Organ starateljstva, Pododjeljenje za socijalnu zaštitu, Odjeljenja za zdravstvo i ostale usluge Vlade Brčko distrikta BiH, postupajući u okviru svojih nadležnosti u saradnji sa Policijom Brčko distrikta i Tužilaštva Brčko distrikta, dana 25.2.2025.godine je zatekao 31 dijete bez roditeljskog staranja, staratelja ili usvojitelja, koji su iste večeri privremeno zbrinuti po Programu zaštite djece žrtava roditeljske zloupotrebe. Za navedenu djecu organ starateljstva imenovao je staratelja po službenoj dužnosti na osnovu dostupnih podataka o identitetu djece. U cilju zaštite najboljeg interesa djece organ starateljstva mišljenja je da trenutni smještaj nije adekvatno dugoročno rješenje za djecu jer ne pruža sigurnost, stabilnost i razvojnu podršku koja je djetetu potrebna tokom odrastanja...” Predmet je evidentiran pod brojem Ž-BL-01-187/25.

Vijeće za djecu BiH dana 12.03.2025. godine izdalo priopćenje zbog medijske pažnje koju je privukao slučaj 31 djeteta pronađenog u privatnoj kući u Brčko distriktu, koja su bila zdravstveno i higijenski zanemarena, uskraćena za osnovna prava i potencijalno žrtve trgovine ljudima. Posebno izražavaju zabrinutost i pozivaju nadležne da moraju osigurati sigurnost djece, privatnost i povjerljivost, zbog istupa pojedinih javnih službenika, jer su ova djeca dodatno izložena riziku od nepotrebne traume i narušavaju proces njegovog oporavka. Faza refleksije, u kojoj se djeca potencijalne žrtve trgovine ljudima trenutno nalaze, zahtijeva minimalnu interakciju s vanjskim svijetom kako bi se osigurala njihova psihofizička stabilizacija. Dodatni razgovori s djecom u ovakvoj fazi, posebno od predstavnika institucija koje nisu dio referalnog mehanizma borbe protiv trgovine ljudima, ne samo da mogu dodatno traumatizirati djecu, već narušavaju i proces njihovog oporavka.

Zakonodavni okvir

Konvencija Ujedinjenih naroda o pravima djeteta

Članak 3.

1. *U svim akcijama u vezi s djecom, bez obzira da li ih poduzimaju javne ili privatne društvene dobrotvorne institucije, sudovi, upravne vlasti ili zakonska tijela, najbolji interesi djeteta biće od prvenstvenog značaja.*

2. *Države-potpisnice uzimaju na sebe da osiguraju djetetu zaštitu i brigu koja je potrebna za njegovu dobrobit, uzimajući u obzir prava i dužnosti njegovih roditelja, zakonskih staratelja ili drugih pojedinaca zakonski odgovornih za njega, i da bi se ovo postiglo, preduzeće sve zakonske i upravne mjere.*

3. *Države-potpisnice će osigurati da se institucije, službe i ustanove odgovorne za brigu o djeci i njihovu zaštitu pridržavaju standarda uspostavljenih od odgovarajućih vlasti, naročito u pogledu sigurnosti, zdravlja, u broju i prikladnosti njihovog osoblja kao i odgovarajućeg nadzora nad njima.*

Ustav Bosne i Hercegovine

Članak II

1. Ljudska prava i temeljne slobode

Bosna i Hercegovina i oba entiteta osigurati će najvišu razinu međunarodno priznatih ljudskih prava i temeljnih sloboda.

2. Međunarodni standardi

Prava i slobode predviđeni u Europskoj konvenciji za zaštitu ljudskih prava i temeljnih sloboda i u njenim protokolima se izravno primjenjuju u Bosni i Hercegovini. Ovi akti imaju prioritet nad svim ostalim zakonima.

Zakon o Ombudsmanu za ljudska prava Bosne i Hercegovine¹

Članak 1.

¹ „Službeni glasnik BiH“ broj: 32/00, 19/02, 34/05, 32/06 i 61/23

1. Ombudsman za ljudska prava Bosne i Hercegovine je neovisna institucija uspostavljena u cilju promoviranja dobre uprave i vladavine prava, zaštite prava i sloboda fizičkih i pravnih lica, kako je zagwarantirano posebno Ustavom Bosne i Hercegovine i međunarodnim sporazumima koji se nalaze u dodatku tog Ustava koja će s tim u vezi nadgledati aktivnosti institucija Bosne i Hercegovine, njenih entiteta i distrikta Brčko, u skladu sa odredbama ovog Zakona.

Članak 2.

1. Institucija će razmatrati predmete koji se odnose na slabo funkcioniranje ili povrede ljudskih prava i sloboda počinjene od strane bilo kojeg organa vlasti u Bosni i Hercegovini.

2. Institucija će djelovati po prijemu žalbe ili ex officio....

Članak 25.

Organi vlasti u Bosni i Hercegovini obavezni su Instituciji pružiti odgovarajuću pomoć u istrazi i vršenju kontrole.

Članak 32.

Ombudsman može dati preporuke organima vlasti u Bosni i Hercegovini

Zaključak Ombudsmana Bosne i Hercegovine

Zakonom o Ombudsmanu za ljudska prava Bosne i Hercegovine članak. 1. stavak. 1. propisano je da je Ombudsman za ljudska prava BiH neovisna institucija uspostavljena u cilju promoviranja dobre uprave i vladavine prava, zaštite prava i sloboda fizičkih i pravnih osoba, kako je zajamčeno posebno Ustavom BiH i međunarodnim sporazumima iz dodatka tog Ustava, koja će nadgledati aktivnosti institucija Bosne i Hercegovine, njenih entiteta i Brčko Distrikta Bosne i Hercegovine, sukladno odredbama ovog zakona.

Konvencija Ujedinjenih nacija o pravima djeteta sastavni dio Ustava Bosne i Hercegovine, što je čini dokumentom koji bi trebali svi primjenjivati u postupcima koji se odnose na djecu, vodeći računa da postupanja budu u najboljem interesu djeteta.

Pronalazak 31 djeteta u privatnoj kući u Brčko distriktu, bez roditeljske pratnje, koja su bila zdravstveno i higijenski zanemarena, uskraćena za osnovna prava i potencijalno žrtve trgovine ljudima, pred nadležna tijela kaznenog gonjenja i socijalne zaštite Brčko distrikta BiH stavilo je obvezu provođenja brojnih radnji, prije svega u cilju zaštite djece a potom otkrivanja i sankcioniranja počinitelja kaznenih djela.

Međutim, istovremeno su se pokazale i slabosti sustava zaštite žrtava kaznenih djela. Očigledno je izostala adekvantna prevencija, prostor koji je korišten za smještaj djece prilagođeni je prostor lokalnog hotela a evidentno nisu uspostavljena efikasna pravila i prakse koji bi osigurali apsolutnu fizičku i psihološku zaštitu djece.

Dana 14. 3. 2025. godine u Brčkom je održana konferencija za medije², tijekom koje se moglo konstatirati da Policija Brčko distrikta i Tužiteljstvo Brčko distrikta još od 2018./2019. godine imaju saznanja o nelegalnom objektu, tako reći „nelegalnom vrtiću“, na označenoj adresi u Brčkom

² <https://radiobrcko.ba/vijesti-brcko/brcko-od-19-identifikovane-djece-za-15-ih-je-utvrdjeno-drzavljanstvo-od-cega-je-devet-drzavljana-hrvatske-i-pet-bih/>

i boravku djece u istom. Postavlja se pitanje, kako je moguće da na području Brčko distrikta BiH bude nelegalni vrtić, je li o istom upoznat Inspektorat Vlade Brčko distrikta BiH, Vlada Brčko distrikta BiH, Odjel za zdravstvo i ostale usluge, Pododjel za socijalni rad kao i koje mjere i radnje su poduzete vezano za isto.

Nadalje, djeca koja su potencijalne žrtve trgovine ljudima imaju pravo na potpunu zaštitu svojih osobnih podataka i informacija o njihovom slučaju. Objavljivanje bilo kakvih detalja o njihovom smještaju, razgovorima ili trenutnom stanju, krši ova prava i može ugroziti njihovu sigurnost. Krizni smještaj u ovom slučaju ima ulogu sigurne kuće, što znači da pristup djeci mora biti strogo kontroliran i ograničen na neophodne intervencije.³

Ombudsmeni Bosne i Hercegovine u svojim brojnim izvješćima i analizama ukazuju na činjenicu da djeca i dalje čine značajan postotak žrtava trgovine ljudima u BiH i da su podvrgnuta seksualnom iskorištavanju, radnoj eksploataciji, prisilnom prosjačenju i dječijem braku. "Tamnu brojku" neprepoznatih i neotkrivenih slučajeva trgovine djecom prate izazovi u prikupljanju podataka i zabrinutost zbog nedostatka konceptualne jasnoće o tome šta predstavlja trgovinu djecom, a šta srodna kaznena djela koja uključuju seksualno zlostavljanje i iskorištavanje djece, u što se ubraja i zlostavljanje djece na internetu (slike zlostavljanja djece), prosjačenje i rad djece (posebno najgori oblici dječjeg rada).

Ombudsmeni BiH konstatiraju da veliku ulogu treba da ima prevencija i sprečavanje rizika da djeca postanu žrtve trgovine ljudima, posebno u vidu podrške obiteljima gdje ključnu ulogu imaju centri za socijalni rad, ali i sve druge institucije sustava.

Nadležne institucije, kao i nevladine organizacije koje rade na suzbijanju i prevenciji prosjačenja suočavaju sa problemima nezainteresiranosti, ignoriranja i nepriznavanja postojanja pojave prosjačenja djece u Bosni i Hercegovini.

Posebno ranjive grupe djece izložene su riziku da postanu žrtve trgovine ljudima su siromašna djeca, zanemarena i odgojno zapuštena djeca, djeca žrtve nasilja u obitelji, djeca iz disfunkcionalnih obitelji, romska djeca, djeca migranti, djeca bez roditeljskog staranja, djeca smještena u ustanovama socijalne zaštite ili u ustanovama za djecu u sukobu sa zakonom.

Prepoznavši navedene probleme Ombudsmeni Bosne i Hercegovine su kroz izradu svojih Specijalnih izvješća kao i u svojim godišnjim rezultatima aktivnosti Institucije ombudsmana ukazivali na isto⁴. Navedena godišnja i specijalna izvješća prezentirana su Predsjedništvu Bosne i Hercegovine, Parlamentu Bosne i Hercegovine, Parlamentu Federacije Bosne i Hercegovine, Narodnoj Skupštini Republike Srpske, kao i Skupštini Brčko distrikta Bosne i Hercegovine.

Ombudsmeni Bosne i Hercegovine napominju da je na sjednici održanoj 23. listopada 2024. godine, Vijeće ministara Bosne i Hercegovine usvojilo **Strategiju suprotstavljanja trgovini ljudima za period od 2024. do 2027. godine**. Riječ je o ključnom instrumentu politike prevencije i suzbijanja trgovine ljudima u Bosni i Hercegovini. Nova Strategija se konceptualno i sadržajno značajno oslanja na standarde Europske unije i druge međunarodne smjernice u oblasti suprotstavljanja

³ Vijeće za djecu, saopštenje za javnost 12.03.2025.godine

⁴ <https://www.ombudsmen.gov.ba/Default.aspx?id=0&lang=HR#>

trgovini ljudima, a planirane strateške mjere provodiće se u periodu od 2024. do 2027. godine, s ciljem ispunjenja općih i posebnih strateških ciljeva koji su definirane Strategijom. Pored strateških ciljeva i mjera, važno je i što Strategija sadrži statističke podatke za period od 2020. godine do 2023. godine (broj identifikovanih potencijalnih žrtava trgovine ljudima, oblici eksploatacije žrtava, spolna struktura žrtava, starosna struktura i struktura žrtava trgovine ljudima po državljanstvu).

Ombudsmani Bosne i Hercegovine ukazuju da shodno obavezama koje proizilaze iz Konvencije o pravima djeteta nadležni trebaju poduzimati sve odgovarajuće zakonske, upravne, društvene i obrazovne mjere da bi se dijete zaštitilo od svih oblika fizičkog ili mentalnog nasilja, povreda ili zlostavljanja, zanemarivanja ili nemarnog postupanja, zloupotrebe ili eksploatacije, uključujući i seksualno zlostavljanje dok je na brizi roditelja, staratelja ili bilo koje druge osobe koja se brine o djetetu. Ombudsmani stoga Policiji Brčko distrikta BiH i Tužiteljstvu Brčko distrikta BiH preporučuju da u vezi sa ekstremnim kršenjem prava djeteta na području Brčko distrikta Bosne i Hercegovine, poduzmu sve neophodne aktivnosti na pronalaženju i sankcioniranju učinitelja kaznenih djela a Vladi Brčko distrikta BiH da osigura mehanizme zaštite i koordinacije nadležnih tijela u aktivnostima na suprotstavljanju trgovini ljudima.

Uzimajući u obzir naprijed navedeno, postupajući sukladno svojim ovlaštenjima, temeljem odredbi članka 32. Zakona o Ombudsmanu za ljudska prava Bosne i Hercegovine (Službeni list BiH 32/00, 19/02, 35/04, 32/06, 50/08 i 61/23) Ombudsmani Bosne i Hercegovine odlučujući u predmetnoj pravnoj stvari upućuju:

PREPORUKU

1. Ministarstvu civilnih poslova Bosne i Hercegovine i Ministarstvu za ljudska prava i izbjeglice Bosne i Hercegovine da djelujući u okviru svojih nadležnosti:

- u koordinaciji sa tijelima i ustanovama svih razina vlasti pruže pomoć i podršku radi sigurnog smještaja 31 djeteta sa prostora Brčko distrikta BiH, koji su pronađeni u privatnoj kući u Brčko distriktu, bez roditeljske pratnje, zdravstveno i higijenski zanemarena, uskraćeni za temeljna prava i potencijalno žrtve trgovine ljudima.
- poduzmu neophodne radnje i mjere koje osiguravaju zaštitu prava djeteta od svih vidova eksploatacije ili nasilja a posebno od opasnosti da postanu žrtve trgovine ljudima.

2. Vladi Brčko distrikta BiH da:

- poduzme neophodne aktivnosti u cilju usvajanja Akcionog plana za provođenje Strategije suprotstavljanja trgovini ljudima u Bosni i Hercegovini za području Brčko distrikta BiH i osigura stalni monitoring provođenja Strategije i akcionog plana;
- unaprijedi mehanizme međusobne suradnje i koordinacije između institucija na suprotstavljanju trgovini ljudima na području Brčko distrikta BiH,
- osnaži multidisciplinarni pristup u radu koordinacionih timova uz učešće vlasti nadležnih za kazneno gonjenje, socijalnu zaštitu, zdravstvo, mentalno zdravlje, obrazovanje, besplatnu pravnu pomoć, granicu i strance,
- radi ispunjenja strateških mjera razmotri mogućnost osnivanja ustanove u kojoj bi se osigurao siguran smještaj djece koja su u riziku od bilo kojeg vida eksploatacije ili nasilja, te poduzmu

neophodne radnje radi uspostave dnevnog centra za djecu koja rade i žive na ulici ili su u riziku da to postanu,

- kontinuirano jača resurse Pododjela za socijalnu zaštitu za efikasno obavljanje poslova starateljstva nad djecom kojima je neophodna intervencija i pomoć nadležnih, djecom koje su žrtve kaznenih djela, uključujući i trgovine ljudima.


-da Vlada Brčko distrikta BiH osigura mehanizme zaštite i koordinacije nadležnih tijela u aktivnostima na suprotstavljanju trgovini ljudima.


3. Policiji Brčko distrikta BiH i Tužiteljstvu Brčko distrikta BiH da:


- poduzmu sve neophodne aktivnosti na pronalaženju i sankcioniranju učinitelja kaznenih djela u predmetnoj pravnoj stvari, te razvoju strategija i koordinaciji nadležnih tijela u aktivnostima na suprotstavljanju trgovini ljudima.


4. da svi u roku od 15 dana, od dana prijema ove preporuke izvjeste Ombudsmane Bosne i Hercegovine o načinu ispoštovanja iste.

Ombudsmani Bosne i Hercegovine:




Nives Jukić


dr Nevenko Vranješ


dr Jasminka Džumhur

Dostavljeno:

1x naslovu

1x u spis